



## UNIVERSITI MELAKA

### KAEDAH-KAEDAH UNIVERSITI MELAKA (AKADEMIK),1994 (PINDAAN 2022)

BAHAGIAN I	:	PENTAKRIFAN
BAHAGIAN II	:	PROGRAM-PROGRAM PENGAJIAN
BAHAGIAN III	:	SYARAT-SYARAT PENERIMAAN MASUK DAN PENDAFTARAN
BAHAGIAN IV	:	PEPERIKSAAN
BAHAGIAN V	:	PENGANUGERAHAN IJAZAH SARJANA MUDA / DIPLOMA
BAHAGIAN VI	:	PENDAFTARAN KURSUS
BAHAGIAN VII	:	PERTUKARAN PROGRAM PENGAJIAN
BAHAGIAN VIII	:	PENANGGUHAN SEMESTER
BAHAGIAN IX	:	PEMBERHENTIAN / DIBERHENTIKAN DARI PENGAJIAN
BAHAGIAN X	:	PERUNTUKAN AM

**UNIVERSITI MELAKA  
KAEADAH-KAEADAH UNIVERSITI MELAKA (AKADEMIK),1994  
(PINDAAN 2022)**

---

Pada menjalankan kuasa-kuasa yang diberikan oleh Seksyen 9, Perlembagaan Kolej Universiti Islam Melaka (Akademik) 1994, Lembaga Pengarah Kolej Teknologi Islam Melaka Berhad telah meluluskan kaedah-kaedah yang berikut :

**BAHAGIAN I**

**PENTAKRIFAN**

- 1.1      **Nama**  
Kaedah-kaedah ini dinamakan Kaedah-Kaedah Universiti Melaka (Akademik) 1994 (Pindaan 2022) dan hendaklah disifatkan sebagai telah mula berkuatkuasa pada 1994.
- 1.2      **Naib Canselor**  
Naib Canselor dilantik oleh Ketua Menteri Melaka sebagai Ketua Eksekutif, Universiti Melaka atau singkatannya, UNIMEL, bagi menyempurnakan tugas di bawah arahan dan kawalan Ketua Menteri Melaka.
- 1.3      **Timbalan Naib Canselor**  
Timbalan Naib Canselor dilantik oleh Lembaga Pengarah UNIMEL bagi menyempurnakan tugas di bawah arahan Naib Canselor.
- 1.4      **Pendaftar**  
Pendaftar adalah Ketua Pejabat. Pendaftar Universiti bertindak sebagai Setiausaha Senat.
- 1.5      **Pengarah Hal Ehwal Akademik**  
Pengarah Hal Ehwal Akademik dilantik oleh Naib Canselor untuk mengetuai Bahagian Hal Ehwal Akademik.
- 1.6      **Dekan**  
Dekan ialah kakitangan akademik (pensyarah) yang dilantik oleh Naib Canselor untuk mengetuai sesebuah Fakulti.

- 1.7 **Kampus Cawangan UNIMEL**  
Kampus Cawangan UNIMEL ertinya mana-mana kampus cawangan Universiti Melaka yang penubuhannya diluluskan oleh Lembaga Pengarah dan menepati Akta IPTS (1996).
- 1.8 **Program**  
Program ertinya pengajian peringkat Diploma / Ijazah Sarjana Muda yang telah ditetapkan secara tersusun dan diperakukan oleh Senat Universiti, yang membawa kepada penganugerahan sesuatu Diploma dan Ijazah Sarjana Muda.
- 1.9 **Sistem Semester**  
Sistem semester ertinya satu sistem pembahagian tahun akademik kepada **dua semester panjang atau tiga semester (dua semester panjang dan satu semester pendek) berasingan** dalam masa satu tahun pengajian dan pencapaian pelajar dinilai dengan mengambil kira purata semua gred atau dipanggil Purata Nilai Gred Semester (PNGS) yang diperolehi pada tiap-tiap semester.
- 1.10 **Kursus**  
Kursus ertinya mata pelajaran atau latihan yang disediakan dalam satu tempoh tetapi biasanya satu semester yang ditawarkan dalam sesuatu program pengajian.
- 1.11 **Koordinator Program / Penyelaras Program**  
Koordinator Program / Penyelaras Program adalah kakitangan akademik (pensyarah) yang dilantik oleh Naib Canselor bagi menyelaras sesuatu program.
- 1.12 **Jawatankuasa Tetap Senat Peperiksaan (JTSP)**  
Jawatankuasa Tetap Senat Peperiksaan ertinya satu jawatankuasa yang ditubuhkan oleh Senat yang bertanggungjawab dalam urusan peperiksaan Universiti.
- 1.13 **Pemeriksa**  
Pemeriksa ialah seorang pensyarah yang bertanggungjawab memeriksa skrip jawapan bagi sesuatu kursus tertentu dalam satu jangka masa yang ditetapkan.
- 1.14 **Peperiksaan Akhir Semester**  
Peperiksaan Akhir Semester ertinya satu peperiksaan yang dijalankan pada penghujung tiap-tiap semester pengajian.

- 1.15 **Penilaian**  
Penilaian ertiannya sesuatu mekanisme untuk mengukur pencapaian akademik seseorang pelajar.
- 1.16 **Pengawas Peperiksaan**  
Pengawas peperiksaan ialah staf akademik atau pegawai atau pembantu peperiksaan yang ditugaskan untuk mengawasi perjalanan sesuatu peperiksaan mengikut peraturan peperiksaan yang telah ditetapkan oleh Universiti.
- 1.17 **Gred**  
Gred ertiannya simbol huruf atau abjad yang digunakan untuk menunjukkan pencapaian pelajar dalam sesuatu kursus.
- 1.18 **Nilai Gred**  
Nilai Gred merupakan suatu nilai dalam bentuk angka bagi menunjukkan pencapaian pelajar pada sesuatu semester.
- 1.19 **Nilai Kredit**  
Nilai Kredit adalah nilai dalam bentuk angka hasil daripada pendaraban nilai gred dengan jam kredit seperti berikut :
- $$\text{Nilai Kredit} = (\text{Nilai Gred}) \times (\text{Jam Kredit})$$
- 1.20 **Purata Nilai Gred Semester / Grade Point Average (PNGS/GPA)**  
Purata nilai gred semester ialah ukuran pencapaian akademik seseorang pelajar dalam sesuatu semester.
- 1.21 **Purata Nilaian Gred Kumulatif / Cumulative Grade Point Average (PNGK / CGPA)**  
PNGK ialah ukuran pencapaian akademik seseorang pelajar bagi keseluruhan semester yang telah disempurnakan.
- 1.22 **Rayuan**  
Rayuan ertiannya sesuatu permohonan bertulis yang dikemukakan oleh seseorang pelajar kepada Universiti untuk pertimbangan semula bagi sesuatu keputusan yang telah diputuskan.
- 1.23 **Pelajar**  
Pelajar adalah seseorang yang berdaftar dan sedang mengikuti sesuatu program pengajian di Universiti.

1.24

**Latihan Dalam Kerja / Amali / Praktikal / Industri / Praktikum**

Latihan Dalam Kerja / Amali / Praktikal / Industri / Praktikum ialah pembelajaran luar kuliah dengan maksud memberi pendedahan dan memahami tanggungjawab alam pekerjaan sebenar.

1.25

**Ko-kurikulum**

Ko-kurikulum adalah kegiatan luar kuliah yang ditetapkan oleh Universiti untuk memenuhi salah satu syarat penganugerahan sesuatu Diploma / Ijazah Sarjana Muda.

1.26

**Penganugerahan Kecemerlangan Akademik**

1.26.1 **Anugerah Dekan**

Anugerah Dekan adalah anugerah kepujian kepada pelajar yang memperolehi PNGS minimum 3.50 bagi sekurang-kurangnya 12 jam kredit atau mengikut jumlah jam kredit sebenar dalam struktur program pengajian semasa, tidak termasuk kursus berbentuk Lulus/Gagal pada sesuatu semester.

1.26.2 **Anugerah Naib Canselor**

Anugerah Naib Canselor adalah anugerah kecemerlangan atau kepujian kepada seseorang pelajar yang telah berjaya menamatkan pengajiannya dengan memperolehi **Anugerah Dekan** sepanjang tempoh pengajian Diploma / Ijazah Sarjana Muda di Universiti.

1.26.3 **Diploma**

Diploma adalah penganugerahan kepada seseorang pelajar yang telah menyempurnakan semua kursus-kursus dan memenuhi keperluan programnya atau telah menamatkan pengajiannya di peringkat Diploma.

1.26.4 **Ijazah Sarjana Muda**

Ijazah Sarjana Muda adalah penganugerahan kepada seseorang pelajar yang telah menyempurnakan semua kursus-kursus dan memenuhi keperluan programnya atau telah menamatkan pengajiannya di peringkat Ijazah Sarjana Muda.

## **BAHAGIAN II**

### **PROGRAM PENGAJIAN**

- 2.1 Universiti menawarkan program pengajian di peringkat Diploma / Ijazah Sarjana Muda dan lain-lain program pengajian seumpamanya yang akan dijalankan dari semasa ke semasa seperti yang dibenarkan oleh Perlembagaan Universiti, (2010).
- 2.2 Kursus pengajian untuk program-program peringkat Diploma / Ijazah Sarjana Muda hendaklah mengandungi kursus-kursus yang telah termaktub dan diluluskan oleh Kementerian Pengajian Tinggi (KPT) dan Agensi Kelayakan Malaysia (MQA).

## **BAHAGIAN III**

### **SYARAT-SYARAT PENERIMAAN MASUK DAN PENDAFTARAN**

- 3.1 Syarat kemasukan ke program-program pengajian sesuatu peringkat Diploma / Ijazah Sarjana Muda Universiti ini hendaklah dengan ketetapan oleh Senat dan dipersetujui oleh Ahli Lembaga Pengarah Universiti serta tertakluk kepada kelulusan dari Kementerian Pengajian Tinggi (KPT).
- 3.2 Syarat kemasukan ke sesuatu program pengajian bagi memperolehi Diploma / Ijazah Sarjana Muda adalah tertakluk kepada syarat pendaftaran untuk program itu, mendaftar untuk program tersebut pada permulaan tiap-tiap semester sehingga tamat dan membayar yuran-yuran yang ditetapkan.
- 3.3 Tertakluk kepada peruntukan-peruntukan dalam bahagian ini dan lain-lain Kaedah atau Peraturan-Peraturan, seseorang pelajar yang berdaftar untuk program bagi memperolehi Diploma / Ijazah Sarjana Muda Universiti ini atau institusi pengajian yang bersekutu.
- 3.4 Pelajar dikehendaki memenuhi syarat-syarat pendaftaran dan lain-lain syarat yang ditetapkan oleh pihak Universiti.
- 3.5 Pelajar hendaklah menamatkan pengajian mereka dalam tempoh yang dibenarkan oleh peruntukan dalam peraturan-peraturan yang dibuat di bawah Kaedah ini.

## **BAHAGIAN IV**

### **PEPERIKSAAN**

- 4.1 Tidak ada calon yang dianggap memenuhi Kaedah ini, melainkan ia telah tamat dalam peperiksaan tersebut dan diluluskan oleh Senat Universiti.
- 4.2 Hendaklah diadakan pada akhir tiap-tiap semester satu peperiksaan bagi menguji dan menilai serta memberi gred bagi kursus-kursus pengajian yang ditetapkan.
- 4.3 Markah-markah dan gred yang diberikan kepada seseorang calon untuk sesuatu peperiksaan, dan perjalanan mesyuarat Jawatankuasa Tetap Senat Peperiksaan hendaklah dirahsiakan.
- 4.4 Keputusan peperiksaan bagi kursus-kursus tertentu atau keputusan bagi sesuatu semester bolehlah diisyiharkan tertakluk kepada perakuan dan kelulusan Senat.
- 4.5 Tertakluk kepada Kaedah ini dan lain-lain peruntukan, Senat boleh menentukan peraturan, tatacara, jumlah, bentuk dan bidang peperiksaan, pelantikan, kuasa dan kewajipan Jawatankuasa Tetap Senat Peperiksaan, urusan menjalankan peperiksaan, kelayakan calon masuk peperiksaan dan apa-apa perkara lain yang berkenaan peperiksaan.
- 4.5.1 **Jawatankuasa Tetap Senat Peperiksaan** hendaklah terdiri daripada Timbalan Naib Canselor atau orang yang dinamakan olehnya dan hendaklah menjadi Pengerusi, yang ahli-ahlinya terdiri daripada :
- a) Pengarah Hal Ehwal Akademik
  - b) Dekan
  - c) Ketua Unit IT
  - d) Unit Peperiksaan - Urusetia
- 4.5.2 Jawatankuasa Tetap Senat Peperiksaan hendaklah bertanggungjawab kepada Senat bagi menjalankan tanggungjawabnya dalam hal-hal yang berkaitan dengan peperiksaan.

4.6 Senat hendaklah memaklumkan supaya arahan-arahan dikeluarkan kepada pemeriksa-pemeriksa oleh Jawatankuasa Tetap Senat Peperiksaan dan ianya hendaklah **dirahsiakan**.

4.6.1 Senat terdiri daripada :

1. Naib Canselor	-	Pengerusi
2. Semua Timbalan Naib Canselor	-	Ahli
3. Semua Pengarah	-	Ahli
4. Semua Dekan	-	Ahli
5. Pustakawan	-	Ahli
6. Ketua Unit IT	-	Ahli
7. Pegawai Undang-Undang	-	Ahli
8. Pendaftar	-	Setiausaha

4.7 Semua keputusan peperiksaan yang diperolehi oleh seseorang pelajar itu akan dicatatkan dalam rekod akademiknya.

4.8 Semua markah yang diperolehi oleh pelajar akan diambilkira untuk menentukan Purata Nilai Gred Kumulatif (PNGK) sebagai kiraan prestasi akademik masing-masing.

4.9 Pelajar boleh dikecualikan atau dibenarkan di bawah Kaedah ini atau Peraturan-peraturan yang dibuat di bawah Kaedah ini, seseorang pelajar hendaklah menunjukkan kemajuan yang memuaskan untuk layak meneruskan pengajian ke semester berikutnya.

4.10 Walau apapun peruntukan mana-mana Kaedah dan Peraturan-peraturan Peperiksaan, jika seseorang calon yang cacat anggota tidak dapat mengambil sesuatu peperiksaan yang ditetapkan, Jawatankuasa Tetap Senat Peperiksaan boleh, atas syor Fakulti pengajian yang berkenaan, membenarkan supaya ia diganti dengan suatu mekanisme yang difikirkan sesuai oleh Jawatankuasa Tetap Senat Peperiksaan bagi membolehkan pelajar tersebut menduduki peperiksaan.

4.11 Tertakluk kepada Peraturan-peraturan yang dibuat di dalam Kaedah ini, **Peperiksaan Khas** dan **Peperiksaan Ulangan** boleh diatur kepada mana-mana calon.

4.11.1 **Peperiksaan Khas** adalah bagi pelajar yang tidak menduduki peperiksaan atas sebab-sebab kesihatan atau kecemasan, (peperiksaan tersebut hendaklah dijalankan dalam tempoh **14**

**hari** selepas keputusan peperiksaan akhir semester diumumkan). Permohonan mestilah dibuat oleh pelajar kepada Bahagian Hal Ehwal Akademik dengan sokongan Dekan Fakulti. Tiada sebarang pembayaran dikenakan. Sekiranya permohonan dibuat selepas dari tempoh di atas, pelajar perlulah mendaftar semula kursus tersebut pada semester berikutnya.

- 4.11.2 **Peperiksaan Ulangan** (menduduki semula peperiksaan) adalah untuk pelajar yang gagal atau pelajar yang ingin membaiki keputusan peperiksaan (gred A- dan ke bawah) dan perlu diambil pada semester berikutnya sahaja. Tempoh permohonan perlu dibuat 14 hari selepas keputusan peperiksaan diumumkan. Permohonan mestilah dibuat oleh pelajar kepada Bahagian Hal Ehwal Akademik dengan sokongan Dekan Fakulti. Sekiranya permohonan dibuat selepas dari tempoh di atas, pelajar perlulah mendaftar semula kursus tersebut.
- 4.12 Pelajar yang sakit untuk tempoh yang agak lama (boleh diberikan tempoh dalam minggu, bulan atau tahun) dengan mempunyai bukti bertulis daripada hospital atau doktor perubatan yang diiktiraf, boleh diberi pengecualian daripada menduduki peperiksaan untuk sesuatu semester tertentu oleh Jawatankuasa Tetap Senat Peperiksaan selepas diperakukan oleh Fakulti berkenaan. Dalam kes-kes seperti ini, bukti bertulis diperolehi daripada hospital atau doktor perubatan yang diiktiraf boleh diterima oleh Fakulti.
- 4.13 Tertakluk kepada Peraturan-peraturan di bawah Kaedah ini, pelajar yang diterima masuk dengan kelayakan akademik selain daripada kelayakan biasa yang diterima sebagai ganti syarat kelayakan masuk ke Universiti ini, boleh diberi pemindahan kredit sebanyak 30% daripada jumlah jam kredit program yang bakal diikuti di Universiti ini.
- 4.14 Hendaklah ada suatu Jawatankuasa Rayuan yang bertanggungjawab mempertimbangkan permohonan pelajar yang Gagal dan Diberhentikan (GB) untuk tujuan meneruskan pengajian di Universiti.
- 4.14.1 Ahli Jawatankuasa Rayuan terdiri daripada :
- Pengarah Hal Ehwal Akademik
  - Dekan-Dekan
  - Unit Peperiksaan - Urusetia

## **BAHAGIAN V**

### **PENGANUGERAHAN DIPLOMA / IJAZAH SARJANA MUDA**

- 5.1 Untuk layak dianugerahkan sesuatu Diploma / Ijazah Sarjana Muda seseorang calon hendaklah memenuhi syarat keperluan program dan lulus semua kursus dalam tempoh masa yang ditetapkan dan tertakluk kepada syarat-syarat berikut :
- 5.1.1 telah berdaftar sebagai pelajar Universiti,
  - 5.1.2 menyempurnakan kursus-kursus dengan memuaskan Senat bagi kursus pengajian yang ditentukan untuk Diploma / Ijazah Sarjana Muda oleh Kaedah ini dan Peraturan-peraturan yang dibuat di bawah Kaedah ini, melainkan dikecualikan oleh Senat daripada kehadiran kursus semester pertama dan kedua (pemindahan kredit),
  - 5.1.3 telah menyempurnakan sekurang-kurangnya tempoh minima sesuatu pengajian yang telah ditetapkan (rujuk jadual : Tempoh Pengajian),
  - 5.1.4 mencapai Purata Nilai Gred Kumulatif (PNGK) yang minimum yang ditetapkan.
  - 5.1.5 telah membayar semua yuran Universiti yang ditentukan.

## **BAHAGIAN VI**

### **PENDAFTARAN KURSUS**

- 6.1 Pra pendaftaran perlu dilakukan oleh setiap pelajar secara atas talian (rujuk lampiran II, fasal 1.0).
- 6.2 Semua pelajar adalah diwajibkan mendaftar secara atas talian pada setiap kursus yang diambil pada setiap semester pengajian.
- 6.3 Semua pelajar mesti mendaftar kursus mengikut kod kursus yang betul.

- 6.4 Pendaftaran kursus mesti dibuat sebelum tamat tempoh pendaftaran wajib, iaitu **dua (2) minggu** selepas semester pengajian bermula (rujuk lampiran II, fasal 2.3).
- 6.5 Seseorang pelajar hanya boleh mendaftar mana-mana kursus yang telah ditetapkan oleh Fakulti pada masa-masa ianya ditawarkan.
- 6.6 Permohonan pendaftaran kursus yang lewat dalam tempoh yang ditetapkan tanpa sebab-sebab bertulis yang boleh diterima oleh Universiti akan dikenakan denda (rujuk lampiran II, fasal 3.0).
- 6.7 Pelajar yang tidak mendaftar kursus setelah tamat tempoh pendaftaran berdenda akan diberhentikan daripada pengajian, kecuali atas sebab-sebab yang diterima oleh Universiti.
- 6.8 Pembetulan pendaftaran kursus:
- 6.8.1 Pelajar hendaklah bertanggungjawab membetulkan sebarang kesilapan yang terdapat dalam rekod pendaftaran mana-mana kursus dalam tempoh yang ditetapkan.
- 6.8.2 Permohonan pembetulan lewat dalam tempoh yang telah ditetapkan tanpa sebab-sebab bertulis yang boleh diterima akan dikenakan denda (rujuk lampiran II, fasal 4.0).
- 6.8.3 Rujuk **Prosedur Pendaftaran Kursus / Subjek**

## BAHAGIAN VII

### PERTUKARAN PROGRAM PENGAJIAN

- 7.1 Pertukaran program pengajian tidak digalakkan. Walau bagaimanapun, Universiti boleh mempertimbangkan untuk permohonan pertukaran program pengajian dalam atau antara Fakulti dengan syarat:-
- 7.1.1. Pertukaran program perlu mendapatkan kebenaran daripada Dekan Fakulti asal dan Dekan Fakulti baharu program yang dipohon.
- 7.1.2. Permohonan pertukaran program hanya dibenarkan untuk pelajar semester 1 sahaja sebelum minggu keempat (4) pengajian.

- 7.1.3 Pencapaian Akademik pelajar tidak boleh berada dalam kedudukan Gagal dan diberhentikan (GB).
- 7.1.4 Tempoh pengajian program baru akan ditetapkan oleh Fakulti tertakluk kepada pindahan / pengecualian jam kredit yang diluluskan bagi pertukaran program.
- 7.1.5 Pertukaran program pengajian hanya dibenarkan sekali sahaja sepanjang pengajian.
- 7.1.6 Bagi pelajar antarabangsa, pertukaran program pengajian perlu dilakukan mengikut kepada prosedur yang telah di tetapkan oleh pihak Imigresen Malaysia dan Education Malaysia Global Services (EMGS).

## **BAHAGIAN VIII**

### **PENANGGUHAN SEMESTER PENGAJIAN**

- 8.1 Penangguhan semester pengajian boleh dibuat dengan menghantar permohonan ke Bahagian Hal Ehwal Akademik atas sebab-sebab tertentu.
- 8.2 Penangguhan semester perlu mendapatkan sokongan daripada Dekan / Timbalan Dekan Fakulti terlebih dahulu sebelum dimajukan kepada Bahagian Hal Ehwal Akademik.
- 8.3 Penangguhan semester hanya boleh dibuat sebanyak 2 (dua) kali sahaja untuk program Diploma / Ijazah Sarjana Muda sepanjang tempoh pengajian pelajar di Universiti. Sekiranya penangguhan dibuat selepas minggu kelima (5) pengajian, caj yuran penuh akan dikenakan kepada pelajar.
- 8.4 Pelajar yang telah mendapat penangguhan semester perlu mendaftar semula pengajian pada sesi pengajian berikutnya.
- 8.5 Pemulangan yuran pengajian atau baki bayaran yuran yang perlu dijelaskan tertakluk kepada Prosedur Pemulangan Yuran oleh Pejabat Bendahari (rujuk Lampiran V).

## **BAHAGIAN IX**

### **PEMBERHENTIAN / DIBERHENTIKAN DARI PENGAJIAN**

9.1 Pemberhentian / Diberhentikan dari pengajian tertakluk kepada perkara tersebut:

9.1.1 **Berhenti dengan Tamat Pengajian (Graduat)**

Berhenti kerana tamat pengajian adalah merujuk kepada pelajar yang telah menamatkan pengajian dengan menyelesaikan semua syarat di dalam pengajian dan layak bergraduat.

9.1.2 **Berhenti / Diberhentikan kerana Gagal dan Diberhentikan (GB)**

Bahagian ini tertakluk kepada pelajar yang gagal memenuhi syarat kelulusan peperiksaan yang ditetapkan bagi setiap semester iaitu pelajar mendapat tahap Gagal dan Diberhentikan (GB) dari pengajian.

9.1.3 **Berhenti / Diberhentikan Kerana Tindakan Masalah Disiplin**

Bahagian ini tertakluk kepada pelajar yang diarahkan berhenti / diberhentikan dari pengajian setelah diputuskan dalam Mesyuarat Tata tertib kerana melakukan kesalahan disiplin yang melanggar Kaedah-Kaedah Akademik atau Kaedah-Kaedah Tata tertib Pelajar.

9.1.4 **Berhenti / Diberhentikan kerana Menghilangkan Diri Dari Pengajian**

Bahagian ini tertakluk kepada pelajar yang gagal melaporkan diri pada sesuatu semester pengajian tanpa memberikan sebarang permohonan atau makluman kepada pihak UNIMEL berkaitan dengan kegagalan untuk melaporkan diri dalam pengajian pada sesuatu semester pengajian pelajar tersebut. Kegagalan pelajar untuk melaporkan diri pada satu semester membolehkan pelajar tersebut dianggap berhenti oleh pihak UNIMEL. Pelajar yang diterima untuk meneruskan pengajian perlu membayar denda yang ditetapkan.

9.1.5 **Berhenti/ Penarikan Diri Dari Pengajian**

Bahagian ini adalah tertakluk kepada permohonan penarikan diri dari pengajian oleh pelajar sendiri.

- 9.2 Pemulangan yuran pengajian atau baki bayaran yuran yang perlu dijelaskan tertakluk kepada Prosedur Pemulangan Yuran oleh Pejabat Bendahari, UNIMEL (rujuk lampiran V)

## **BAHAGIAN X**

### **PERUNTUKAN AM**

10. Senat dengan persetujuan Ahli Lembaga Pengarah Universiti boleh membuat semua peraturan yang perlu bagi tujuan menguatkuasakan peruntukan Kaedah ini.

# Universiti Melaka

---

# UNIMEL

---

UNIVERSITI ISLAM MELAKA

**PERATURAN-PERATURAN  
PROGRAM PENGAJIAN 1994  
(PINDAAN 2022)**

- 1.0 NAMA**
- 2.0 PROGRAM PENGAJIAN**
- 3.0 PENUBUHAN FAKULTI**
- 4.0 KURIKULUM PENGAJIAN**
- 5.0 SISTEM PENGAJIAN**
- 6.0 JAM KREDIT**
- 7.0 JUMLAH JAM KREDIT**
- 8.0 TEMPOH PENGAJIAN**
- 9.0 PERATURAN PENDAFTARAN**
- 10.0 PENDAFTARAN KURSUS**
- 11.0 SYARAT-SYARAT KEMASUKAN**

**UNIVERSITI MELAKA  
PERATURAN-PERATURAN  
PROGRAM PENGAJIAN 1994  
(PINDAAN 2022)**

---

Pada menjalankan kuasa-kuasa yang diberikan oleh Kaedah-kaedah Kolej Universiti Melaka (Akademik) 1994, Lembaga Pengarah Kolej Teknologi Islam Melaka Berhad mengenakan Peraturan-peraturan seperti berikut :

**1.0      Nama**

Peraturan-peraturan ini bolehlah dinamakan Peraturan Program Pengajian 1994 (Pindaan 2022) yang disifatkan mula berkuatkuasa mulai September 1994.

**2.0      Program Pengajian**

Program-program pengajian di peringkat Diploma / Ijazah Sarjana Muda yang ditawarkan adalah berdasarkan kepada kelulusan dari Kementerian Pengajian Tinggi (KPT) dan tertakluk kepada perubahan dan pertambahan program semasa ke semasa.

**3.0      Penubuhan Fakulti**

Universiti boleh dari semasa ke semasa menubuhkan Fakulti dan program-program pengajian yang lain seperti yang diperuntukan dalam Perlembagaan Kolej Universiti Islam Melaka, 2010.

**4.0      Kurikulum Pengajian :**

**4.1      Teras Umum**

Teras Umum adalah gabungan wajib Mata Pelajaran Umum (MPU) dan Wajib Universiti (WGU).

**4.2      Teras Disiplin**

Teras Disiplin adalah kursus-kursus yang diwajibkan oleh pihak Fakulti dan kursus-kursus wajib pengkhususan kepada semua pelajar yang mendaftar pada Fakulti berkenaan.

**4.4      Kursus Elektif**

Kursus Elektif adalah senarai kursus pilihan yang ditentukan oleh sesebuah Fakulti bagi program Diploma / Ijazah Sarjana Muda.

Kursus ini boleh diambil oleh seseorang pelajar Universiti daripada Fakulti berkenaan atau mana-mana Fakulti yang lain.

4.5 **Latihan Dalam Kerja / Industri / Amali / Praktikal / Praktikum**

Latihan ini boleh diambil oleh seseorang pelajar Universiti mengikut keperluan Fakulti masing-masing.

5.0 **Sistem Pengajian**

Sistem Pengajian terbahagi kepada 2 semester .

5.1 Semester panjang :

TEMPOH	PERKARA
7 minggu	Kuliah, tutorial, makmal dan sebagainya
1 minggu	Cuti pertengahan semester
7 minggu	Kuliah, tutorial, makmal dan sebagainya
3 minggu	Peperiksaan akhir semester

\*Tertakluk kepada perubahan yang diluluskan oleh Senat.

5.2 Semester pendek :

TEMPOH	PERKARA
7 minggu	Kuliah, tutorial, makmal dan sebagainya
1 minggu	Peperiksaan akhir semester

\*Tertakluk kepada perubahan yang diluluskan oleh Senat.

5.3 Semester Khas

- Semester khas adalah semester yang diambil oleh pelajar bagi menampung lebihan kredit bagi sesuatu semester.
- Dijalankan pada cuti semester antara dua sesi pengajian.

**6.0      Jam Kredit**

- 6.1      Kredit ialah ukuran kuantitatif yang melambangkan beban pembelajaran untuk mencapai hasil pembelajaran tertentu.
- 6.2      Jam kredit ini ditentukan berdasarkan sistem Pembelajaran Berdasarkan Hasil (OBE) yang telah diperkenalkan dan dikuatkuasakan oleh Agensi Kelayakan Malaysia (MQA).
- 6.3      Beban pembelajaran adalah suatu ukuran kuantitatif semua aktiviti pembelajaran yang diperlukan untuk mencapai satu set hasil pembelajaran. Aktiviti ini termasuklah kuliah, tutorial, seminar, kajian, kerja praktikal, pembelajaran kendiri, pencarian maklumat, kajian, kerja lapangan serta persediaan dan menduduki peperiksaan dengan mengambil 40 jam pembelajaran notional.
- 6.4      Nilai kredit pada setiap kursus adalah meliputi aktiviti pembelajaran dan pengajaran yang melibatkan pembelajaran bersemuka atau pembelajaran kendiri.
- 6.5      Sistem kredit ini membolehkan aktiviti pembelajaran-pengajaran dijalankan tanpa terikat kepada jam kontak yang berasaskan jumlah minggu pengajaran dalam sesuatu semester.

**7.0      Jumlah Jam Kredit**

- 7.1      Untuk tujuan penganugerahan sesuatu Diploma / Ijazah Sarjana Muda dalam bidang-bidang pengajian yang berkenaan, calon-calon dikehendaki mengumpul sejumlah jam kredit minimum kursus-kursus yang telah ditetapkan iaitu untuk program diploma minimum 90 jam kredit dan untuk program Ijazah Sarjana Muda minimum 120 jam kredit.
- 7.2      Calon-calon dikehendaki mendaftar tidak kurang daripada dua belas (12) jam kredit dan tidak lebih daripada jumlah jam kredit yang telah ditetapkan dalam sesuatu program pengajian pada semester tersebut. Pendaftaran kurang atau lebih daripada tahap yang ditetapkan hendaklah mendapat kelulusan khas Dekan Fakulti.

8.0 **Tempoh Pengajian**

- 8.1 Tempoh Pengajian sepenuh masa sesuatu program pengajian seperti berikut:

Program	Tempoh minimum (semester)	Tempoh maksimum (semester)
Diploma	5	8
Ijazah	7	10

- 8.2 Pengecualian dari had tempoh maksimum pengajian, boleh diberikan hanya kepada pelajar-pelajar yang dibenarkan melengkapkan jam kredit yang tertinggal kerana sesuatu sebab selain daripada kegagalan dalam peperiksaan atau tindakan disiplin, tertakluk kepada Kaedah-kaedah yang berkenaan dan mendapat kelulusan daripada Dekan Fakulti.

9.0 **Peraturan Pendaftaran**

Pelajar dikehendaki mendaftar kursus-kursus yang diambil bagi setiap semester. Pendaftaran kursus bagi sesuatu semester hendaklah disempurnakan mengikut syarat-syarat yang ditetapkan oleh Fakulti pengajian yang berkenaan (rujuk lampiran II).

10.0 **Pendaftaran Kursus**

Seseorang pelajar yang hendak membuat **pendaftaran kursus** mestilah mendapatkan persetujuan daripada Dekan Fakulti pengajian yang berkenaan dengan syarat-syarat berikut :

- 10.1 Menambah sesuatu kursus boleh dilakukan selewat-lewatnya pada hari terakhir minggu kedua (2) semester berkenaan.
- 10.2 Menggugurkan sesuatu kursus boleh dilakukan selewat-lewatnya pada hari terakhir minggu ketiga (3) semester berkenaan.
- 10.3 Seseorang pelajar yang mendaftar bagi sesuatu kursus boleh menambah dan menggugurkan kursus tersebut setelah mendapat persetujuan daripada pensyarah berkenaan.

11.0 **Syarat-Syarat Kemasukan**

Kecuali dalam beberapa hal yang khusus menjadi keperluan Fakulti pengajian yang berkenaan dalam syarat-syarat kemasukan, untuk layak didaftarkan sebagai pelajar Universiti, seseorang itu mestilah memenuhi syarat-syarat yang telah ditetapkan oleh Senat.

11.1 **Kelayakan Diri**

Calon mestilah berumur tidak kurang daripada 16 tahun pada tarikh pengambilan sesuatu program pengajian.

11.2 **Kelayakan Akademik**

Merujuk kepada syarat kemasukan yang telah ditetapkan dan diluluskan oleh Kementerian Pengajian Tinggi (KPT).

11.3 **Lain-lain Syarat Kemasukan**

11.3.1 Calon hendaklah memenuhi keperluan Fakulti pengajian yang dipohon.

11.3.2 Calon hendaklah mengemukakan bukti bertulis daripada pihak yang diiktiraf bahawa ia adalah cukup sihat untuk mengikuti sesuatu program pengajian.

11.3.3 Calon mestilah memenuhi lain-lain syarat kemasukan yang akan ditentukan oleh pihak Universiti dari semasa ke semasa.

11.3.4 Atas budibicara Senat, calon boleh dikehendaki menjalani apa-apa ujian yang ditetapkan dan hadir untuk ditemuduga bagi menilai kelayakan mereka mengikuti sesuatu program pengajian di Universiti.

# Universiti Melaka

---

# UNIMEL

---

UNIVERSITI MELAKA

## PERATURAN-PERATURAN PEPERIKSAAN 1994 (PINDAAN 2022)

**BAHAGIAN I** : PERATURAN- PERATURAN PEPERIKSAAN

**BAHAGIAN II** : PENGIRAAN PRESTASI AKADEMIK

**LAMPIRAN I** : PERATURAN PENGANUGERAHAN  
IJAZAH SARJANA MUDA / DIPLOMA

**LAMPIRAN II** :

1. PRA-PENDAFTARAN
2. PENDAFTARAN/PENYEMPURNAAN PENDAFTARAN
3. PENDAFTARAN LEWAT
4. PINDAAN / PERUBAHAN PENDAFTARAN
5. PEMBATALAN PRA PENDAFTARAN
6. PERTIMBANGAN UNTUK PENANGGUHAN  
PENDAFTARAN
7. PERTIMBANGAN UNTUK TIDAK MENDAFTAR
8. LAIN-LAIN

**LAMPIRAN III** : PERATURAN / TINDAKAN KEPADA PELAJAR YANG  
MENGHADIRI KULIAH KURANG DARIPADA 80%

**LAMPIRAN IV** : PENGIRAAN KEPUTUSAN PEPERIKSAAN

**LAMPIRAN V** : PROSEDUR PEMULANGAN / PEMBAYARAN YURAN

**UNIVERSITI MELAKA  
PERATURAN-PERATURAN PEPERIKSAAN  
1994 (PINDAAN 2022)**

**BAHAGIAN I : PERATURAN-PERATURAN PEPERIKSAAN**

---

Pada menjalankan kuasa-kuasa yang diberikan oleh Kaedah-kaedah Hal Ehwal Akademik 1994 (Pindaan 2022), Senat mengenakan Peraturan-peraturan seperti berikut :

**1.0 Nama**

Peraturan-peraturan ini bolehlah dinamakan Peraturan-peraturan Peperiksaan 1994 (Pindaan 2022) yang disifatkan berkuatkuasa mulai September 1994.

**2.0 Jawatankuasa Tetap Senat Peperiksaan**

Jawatankuasa Tetap Senat Peperiksaan (JTSP) hendaklah mengendalikan semua bentuk penilaian dan peperiksaan Universiti. JTSP ini hendaklah ditubuhkan mengikut peruntukan dalam Kaedah yang berkaitan.

**3.0 Kuasa-kuasa dan Tuqas-Tugas Jawatankuasa Tetap Senat Peperiksaan (JTSP)**

- 3.1 Jawatankuasa ini bertanggungjawab kepada Senat bagi urusan menjalankan semua peperiksaan termasuk melaporkan keputusan-keputusan peperiksaan dan senarai lulusan pelajar untuk dikurniakan Diploma atau Ijazah Sarjana Muda atau kelulusan yang berkaitan.
- 3.2 Jawatankuasa ini mempunyai kuasa mengubah rekod akademik pelajar tetapi hendaklah melaporkan setiap perubahan yang dibuat kepada Senat.
- 3.3 Jika ada sebab-sebab yang wajar, Jawatankuasa ini boleh menggunakan budibacaranya untuk menangguh keputusan peperiksaan seseorang calon.
- 3.4 Jawatankuasa ini berkuasa untuk melantik Ketua Pengawas, Penolong Ketua Pengawas dan Pengawas peperiksaan.
- 3.5 Jawatankuasa ini berkuasa untuk melantik pemeriksa bagi tiap-tiap satu kursus yang memerlukan semakan semula.
- 3.6 Memastikan sesuatu peperiksaan berjalan dengan lancar. Jawatankuasa berkuasa menyediakan garis panduan pengawasan peperiksaan.
- 3.7 Jawatankuasa memberi panduan kepada pemeriksa dalam menjalankan tugasnya dalam sesuatu peperiksaan.
- 3.8 Jawatankuasa menjalankan apa-apa tugas lain yang berkaitan seperti yang diarah oleh Senat.

4.0 **Tugas-Tugas Pemeriksa**

- 4.1 Pemeriksa hendaklah menyediakan dan menyerahkan kepada Dekan Fakulti.

**Sebelum peperiksaan:**

- 4.1.1 Dua (2) set soalan peperiksaan yang sempurna bersama dengan skema jawapan dan pemarkahan dan JSU (Jadual Spesifikasi Ujian) serta cadangan umum pembahagian markah bagi tiap-tiap kursus, lapan (8) minggu sebelum peperiksaan akhir bermula mengikut format yang telah ditetapkan oleh Bahagian Hal Ehwal Akademik.
- 4.1.2 Pemeriksa perlu memaparkan markah tugas calon seminggu sebelum peperiksaan akhir berlangsung.

**Selepas peperiksaan:**

- 4.1.3 Memeriksa skrip jawapan peperiksaan dan seterusnya memasukkan markah calon ke dalam Sistem Akademia UNIMEL dua (2) minggu selepas tarikh peperiksaan kursus tersebut untuk semester biasa dan satu (1) minggu untuk semester pendek.
- 4.1.4 Menyerahkan senarai nama dan markah calon bagi tiap-tiap kertas peperiksaan yang telah dijalankan kepada Dekan dan Bahagian Hal Ehwal Akademik dalam tempoh dua (2) minggu selepas tarikh peperiksaan kursus tersebut untuk semester biasa dan satu (1) minggu untuk semester pendek.

5.0 **Lantikan Pemeriksa Luar**

Sesiapa juga yang bukan kakitangan Universiti boleh dilantik oleh Naib Canselor sebagai pemeriksa / penilai luar.

6.0 **Tarikh Peperiksaan Akhir Semester**

Tarikh Peperiksaan Akhir Semester akan diumumkan oleh Bahagian Hal Ehwal Akademik.

7.0 **Jadual Waktu Peperiksaan Akhir Semester**

- 7.1 Draf Jadual Waktu Peperiksaan Akhir Semester akan disediakan oleh Unit Peperiksaan Bahagian Hal Ehwal Akademik dan hendaklah diedarkan empat (4) minggu sebelum tarikh peperiksaan akhir bermula.

- 7.2 Jika sekiranya berlaku pertembungan jadual waktu peperiksaan di antara kursus-kursus yang mana calon mendaftar untuknya, calon bertanggungjawab untuk memberitahu unit berkenaan secara bertulis dalam tempoh yang dinyatakan oleh notis berkenaan.
- 7.3 Jadual waktu untuk peperiksaan akhir semester hendaklah dipamerkan sekurang-kurangnya dua (2) minggu sebelum peperiksaan akhir bermula.

**8.0 Struktur Penilaian**

- 8.1 Penilaian bagi tiap-tiap kursus dalam semester ialah pemberian markah untuk:
- 8.1.1 Peperiksaan akhir semester.
- 8.1.2 Kerja kursus yang mengandungi penilaian bagi kerja-kerja di makmal, bengkel simulasi, klinikal, kerja lapangan, kuiz, tugas, tutorial dan seminar-seminar yang diadakan sepanjang semester berkenaan.
- 8.1.3 Lain-lain ujian / penilaian yang mungkin diadakan dalam semester berkenaan.
- 8.1.4 Peperiksaan dalam Latihan Amali / Latihan Industri / Latihan Dalam Kerja (*On Job Training*) / Praktikal / Praktikum akan mengandungi penilaian di tempat yang telah ditentukan.
- 8.1.5 Untuk menentukan taraf lulus dan taraf gagal, penilaian adalah dibuat pada akhir tiap-tiap semester berkenaan.
- 8.1.6 Seseorang calon tidak dibenarkan melanjutkan pengajiannya dari semester semasa ke semester berikutnya melainkan ia telah lulus peperiksaan yang ditetapkan bagi semester berkenaan.
- 8.1.7 Bagi sesuatu peperiksaan bertulis, jangkamasa maksimum adalah 3 jam dan minimum 1 jam 30 minit untuk mana-mana peperiksaan sesuatu kursus.

**9.0 Kelayakan Menduduki Peperiksaan**

- 9.1 Tiada seorang calon yang layak menduduki peperiksaan bagi sesuatu kursus yang baginya ia telah mendaftar melainkan :
- 9.1.1 Dekan Fakulti berkenaan memperakukan bahawa calon tersebut adalah calon yang berdaftar secara rasmi dan

telah mengikuti serta menyempurnakan dengan memuaskan kursus semester berkenaan.

- 9.1.2 Telah menghadiri tidak kurang daripada 80% daripada kuliah Latihan Amali / Latihan Industri / Latihan Dalam Kerja (*On Job Training*) / Praktikal / Praktikum yang telah ditetapkan oleh Fakulti berkenaan kecuali untuk Fakulti Kejururawatan (*rujuk lampiran III*).
- 9.1.3 Mempunyai perakuan tidak berhutang (kecuali mendapat kelulusan daripada Pejabat Bendahari).
- 9.1.4 Walau apa pun, peruntukan-peruntukan Perenggan Kecil (9.1.3) dalam keadaan yang istimewa Naib Canselor boleh; atas budi bicaranya, membenarkan seseorang calon yang berhutang dengan Universiti menduduki sesuatu peperiksaan.
- 9.1.5 Naib Canselor, atas budi bicaranya boleh, tidak membenarkan calon yang telah melanggar peraturan atau disiplin daripada menduduki semua peperiksaan yang dijalankan.

#### **10.0 Peraturan Peperiksaan**

- 10.1 Calon-calon mesti hadir pada semua peperiksaan dan memuaskan JTSP bagi semua kursus yang telah ditetapkan, melainkan mendapat pengecualian oleh peruntukan dalam Kaedah-kaedah Hal Ehwal Akademik.
- 10.2 Jika pada bila-bila masa, Naib Canselor mempunyai bukti kukuh bahawa sesuatu soalan peperiksaan telah bocor dan diketahui oleh orang lain selain daripada pemeriksa, JTSP dan orang yang dibenarkan oleh Naib Canselor untuk mengendalikan peperiksaan sebelum masa dan tempoh peperiksaan, ia boleh mengarahkan, supaya peperiksaan tersebut digantung, atau dibatalkan atau mengarahkan supaya satu peperiksaan baru diadakan.
- 10.3 Sebarang bantahan daripada kakitangan akademik bahawa peperiksaan telah tidak dijalankan dengan atau peruntukan-peruntukan yang ditetapkan dalam Kaedah-kaedah Hal Ehwal Akademik 1994 (Pindaan 2022), hendaklah dikemukakan kepada Naib Canselor, dan orang yang dibenarkan oleh Naib Canselor untuk mengendalikan siasatan serta melaporkannya kepada Senat. Senat kemudiannya boleh mengambil tindakan yang perlu.
- 10.4 Calon yang didapati melanggar peruntukan yang di bawah Peraturan-peraturan ini hendaklah didakwa berasaskan kepada peraturan ini. Senat

- kemudiannya boleh mengambil tindakan yang sesuai mengikut peruntukan (10.5).
- 10.5 Jika Senat berpuas hati bahawa calon tertentu telah melanggar mana-mana peruntukan dalam Kaedah dan Peraturan Peperiksaan, Senat boleh:
- 10.5.1 Memberi mandat kepada Naib Canselor supaya mengisyiharkan bahawa calon telah melakukan kesalahan tersebut atau memberitahu calon berkenaan secara individu dan tidak membenarkannya daripada menduduki sesuatu peperiksaan.
  - 10.5.2 *Menggugur nama calon* berkenaan daripada senarai kelulusan.
  - 10.5.3 *Menggantung calon tersebut daripada* menduduki mana-mana peperiksaan untuk tempoh yang difikirkan sesuai.
  - 10.5.4 Mengarahkan calon tersebut supaya *digantung pengajiannya*.
  - 10.5.5 Mengisyiharkan secara bertulis supaya calon tersebut *dibuang* dari Universiti.
  - 10.5.6 Melaporkan kes tersebut kepada Senat supaya tindakan yang sesuai boleh dikenakan.
  - 10.5.7 Mengambil semua atau mana-mana tindakan tersebut atau sebaliknya kepada calon berkenaan.
- 10.6 Universiti hendaklah mempunyai seorang Pegawai Peperiksaan yang bertanggungjawab untuk menyusun dan menjalankan semua urusan peperiksaan, menyimpan rekod-rekod yang sempurna dan membuat pengisyiharan yang berkaitan dengan apa-apa bentuk peperiksaan yang berjadual.
- 10.7 Pegawai Peperiksaan mestilah menentukan bahawa semua perkara yang berkaitan dengan pengendalian peperiksaan dijalankan secara sulit.
- 10.8 Semua soalan, skema pemarkahan dan jawapan serta lain-lain arahan yang berkaitan dengan sesuatu peperiksaan hendaklah diserahkan kepada Dekan Fakulti berkenaan untuk tujuan penyemakan dan piawaiian.
- 10.9 Pegawai Peperiksaan hendaklah bertanggungjawab menguruskan urusan percetakan dan menjaga kerahsiaan soalan peperiksaan tersebut. Kertas soalan yang telah siap mestilah dimaterikan.

11.0 **Tanggungjawab Calon**

- 11.1 Calon dinasihatkan supaya berada di luar Dewan / Bilik Peperiksaan tidak lewat daripada 15 minit sebelum peperiksaan bermula.
- 11.2 Calon dikehendaki menunggu di luar Dewan / Bilik Peperiksaan sehingga diberi kebenaran masuk oleh Pengawas yang bertugas. Calon boleh dibenarkan masuk ke Dewan / Bilik Peperiksaan 15 minit sebelum waktu peperiksaan bermula. Apabila kebenaran masuk telah diberikan, calon hendaklah masuk dengan tertib melalui pintu yang ditetapkan.
- 11.3 Calon tidak dibenarkan masuk ke Dewan / Bilik Peperiksaan selepas 30 minit peperiksaan dimulakan. Calon yang datang selepas 30 minit dari waktu sesuatu peperiksaan dimulakan tidak boleh menduduki peperiksaan tersebut.
- 11.4 Calon yang lewat hadir tetapi tidak melebihi 30 minit daripada waktu peperiksaan dimulakan adalah dibenarkan mengambil peperiksaan, tetapi waktu tamat peperiksaannya bagi kursus tersebut adalah sama dengan calon yang lain yang menduduki peperiksaan yang sama.
- 11.5 Calon tidak boleh meninggalkan Dewan / Bilik Peperiksaan dalam masa 30 minit selepas peperiksaan dimulakan dan 30 minit sebelum peperiksaan berakhir.
- 11.6 Semua calon dikehendaki membawa slip peperiksaan bersama kad matrik atau kad pengenalan ke Dewan / Bilik Peperiksaan. Kad pengenalan, slip peperiksaan dan kad matrik hendaklah diletakkan di sudut kanan atas meja peperiksaan untuk diperiksa oleh Pengawas. Calon tidak dibenarkan menduduki peperiksaan sekiranya tidak berbuat demikian.
- 11.7 Calon yang tidak mempunyai slip peperiksaan tidak dibenarkan mengambil peperiksaan melainkan dengan kebenaran bertulis daripada Unit Peperiksaan, Bahagian Hal Ehwal Akademik.
- 11.8 Calon tidak dibenarkan sama sekali membawa apa-apa buku, kertas suratan, gambar, nota, sebarang alat yang terdapat catatan bertulis, '*programmable calculator*' atau telefon bimbit atau sebarang alat kecuali yang dibenarkan oleh Ketua Pengawas ke dalam atau keluar dari sesuatu Dewan / Bilik Peperiksaan atau;
- Calon tidak dibenarkan sama sekali menerima apa-apa kertas, buku, dokumen, gambar, nota, sebarang alat yang di dalam atau di atasnya terdapat catatan bertulis, '*programmable calculator*' atau alat dari mana-mana orang lain semasa di dalam Dewan / Bilik Peperiksaan.

- Calon dibenarkan menerima daripada Pengawas apa-apa buku, kertas, dokumen / gambar atau lain-lain alat yang dibenarkan oleh Naib Canselor, atas syor Pemeriksa atau Jawatankuasa Peperiksaan.
- 11.9 Alat keperluan yang dipinjamkan kepada calon hendaklah dikembalikan kepada Pengawas Peperiksaan di akhir peperiksaan.
- 11.10 Dalam masa 15 minit sebelum peperiksaan dimulakan, calon dibenarkan:
- 11.10.1 Mengisi Borang Kehadiran dan maklumat yang dikehendaki di muka hadapan skrip jawapan peperiksaan.
- 11.11 Calon hendaklah menulis nama, no. Matrik, no. Kad Pengenalan, Kod Kursus dan Nama Kursus serta nama program maklumat lain yang diperlukan di tiap-tiap skrip jawapan dan lampiran yang digunakan.
- 11.12 Calon hendaklah membaca dengan teliti dan mematuhi arahan yang tercetak pada muka hadapan kertas soalan tersebut.
- 11.13 Calon hendaklah memastikan bahawa mereka telah diberikan kertas soalan yang betul dan muka surat bercetak yang cukup, sebelum mula menjawab. Sekiranya calon mendapat dia telah diberikan kertas soalan yang salah, calon hendaklah dengan serta merta memberitahu Pengawas Peperiksaan yang bertugas.
- 11.14 Semua kerja peperiksaan termasuk *rough work*, mestilah dibuat dalam skrip jawapan. Helaian skrip jawapan tidak boleh dikoyakkan.
- 11.15 Skrip jawapan yang telah digunakan, yang dirosakkan atau kosong, tidak dibenarkan dibawa keluar dari Dewan / Bilik Peperiksaan. Ianya mestilah ditinggalkan di atas meja semasa calon keluar dari Dewan / Bilik Peperiksaan.
- 11.16 Calon tidak dibenarkan berkomunikasi dalam apa bentuk sekalipun dengan calon lain semasa peperiksaan berlangsung.
- 11.17 Calon tidak dibenarkan sama sekali makan, minum atau merokok semasa berada di Dewan / Bilik Peperiksaan.
- 11.18 Di akhir peperiksaan, calon hendaklah memastikan skrip jawapan telah disusun dan diikat dengan sempurna, mengikut arahan, bersama-sama salinan pertama Borang Kehadiran Pelajar, sebelum menyerahkannya kepada Pengawas.
- 11.19 Calon dikehendaki berada di tempat duduk masing-masing selepas tamat peperiksaan. Calon hanya dibenarkan keluar dari Dewan / Bilik

Peperiksaan setelah mendapat arahan berbuat demikian daripada Ketua Pengawas Peperiksaan.

- 11.20 Calon hendaklah masuk dan keluar dari Dewan / Bilik Peperiksaan dalam keadaan tertib dan teratur.
- 11.21 Calon tidak boleh merujuk dan menggunakan sebarang bahan rujukan yang dilarang di dalam atau di luar Dewan / Bilik Peperiksaan bagi keperluan peperiksaan semasa peperiksaan sedang berlangsung.
- 11.22 Calon tidak boleh memberi atau menerima sebarang bantuan daripada pelajar atau pihak lain yang berkaitan dengan peperiksaan semasa peperiksaan kecuali yang dibenarkan oleh Pengawas Peperiksaan.
- 11.23 Calon tidak boleh mula menjawab soalan peperiksaan sebelum masa yang ditetapkan atau meneruskan kerja selepas masa peperiksaan tamat
- 11.24 Semasa berada di dalam Dewan / Bilik Peperiksaan calon hendaklah mematuhi segala arahan Ketua Pengawas / Pengawas Peperiksaan.

**12.0 Pengurusan Dokumen Peperiksaan**

- 12.1 Selepas skrip jawapan diperiksa, pemeriksa mestilah menyerahkan skrip jawapan dan senarai markah akhir kepada Pegawai Peperiksaan bagi tindakan selanjutnya. Skrip jawapan mestilah disimpan dengan sempurna untuk tempoh sekurang-kurangnya enam (6) bulan selepas keputusan peperiksaan diumumkan dan selepas itu, ianya bolehlah dilupuskan.
- 12.2 Rekod mengenai ujian-ujian dan lain-lain penilaian kerja kursus adalah menjadi tanggungjawab pensyarah berkenaan dan hendaklah diserahkan kepada Unit Peperiksaan, Bahagian Hal Ehwal Akademik bersama dengan senarai markah calon.
- 12.3 Bahagian Hal Ehwal Akademik akan mengadakan mesyuarat Jawatankuasa Tetap Senat Peperiksaan (JTSP) bagi memperakulkan keputusan-keputusan peperiksaan akhir semester.

## BAHAGIAN II : PENGIRAAN PRESTASI AKADEMIK

---

### 1.0 Pengiraan Prestasi Akademik dan Simbol-Simbol Dalam Transkrip

Gred dan mata gred yang diberikan untuk menilai prestasi akademik seseorang pelajar dalam sesuatu kursus. Bagi program Diploma Kejururawatan, gred C- dan ke bawah adalah GAGAL bagi kursus-kursus penghususan.

MARKAH	GRED	NILAI GRED	TARAF	
90 - 100	A +	4.00	Cemerlang Tertinggi (CT)	Menunjukkan pencapaian ulung.
80 - 89	A	4.00	Cemerlang Tinggi (CT)	
75 - 79	A -	3.67	Cemerlang (C)	
70 - 74	B +	3.33	Baik (B)	Menunjukkan pencapaian yang lebih tinggi daripada pencapaian purata semua pelajar.
65 - 69	B	3.00	Baik (B)	
60 - 64	B -	2.67	Baik (B)	
55 - 59	C +	2.33	Lulus (L)	Menunjukkan pencapaian yang sama dengan pencapaian purata semua pelajar.
50 - 54	C	2.00	Lulus (L)	
47 - 49	C-	1.67	Lulus Bersyarat (LB)	Menunjukkan pencapaian kurang daripada pencapaian purata semua pelajar.
44 - 46	D+	1.33	Lulus Bersyarat (LB)	
40 - 43	D	1.00	Lulus Bersyarat (LB)	
30 - 39	E	0.67	Gagal (G)	Menunjukkan pencapaian pelajar yang tidak mencukupi atau penarikan diri daripada sesuatu kursus selepas tempoh yang dibenarkan. Pelajar perlu mengulang semula kursus tersebut.
0 - 29	F	0.00	Gagal (G)	
	X		Dihalang	Menunjukkan pelajar dihalang dari mengambil peperiksaan atau ujian dan diberi gred F.

	<b>TL</b>		<b>Tidak Lengkap</b>	Menunjukkan pelajar yang tidak melengkapkan sesuatu kursus. Jumlah jam kredit tidak akan dikira pada semester tersebut.
	<b>TD</b>		<b>Tarik Diri</b>	Gred yang diberikan kepada pelajar yang menarik diri bagi sesuatu kursus dengan kebenaran bertulis dari Dekan Fakulti. Jam kredit subjek yang dicatat TD tidak akan dikira dalam pengiraan PNG dan PNGK semester tersebut.
	<b>PK</b>		<b>Pengecualian Kredit</b>	Menunjukkan pengecualian kredit. Jumlah jam kredit dikira untuk kelayakan bergraduat sahaja.
	<b>L/G</b>		<b>Lulus/ Gagal</b>	Simbol gred ini diberi kepada kursus / latihan dalam kerja / Amali / praktikal / praktikum / industri yang tugasannya atau ujiannya didasarkan atas "lulus / gagal" sahaja. Pelajar perlu mengulang kursus ini sekiranya gagal.
	<b>M/TM</b>		<b>Memuaskan/ tidak Memuaskan</b>	Menunjukkan kursus-kursus yang mempunyai tugasannya atau ujiannya berdasarkan kepada "memuaskan / tidak memuaskan" sahaja. Pelajar tidak perlu mengulang sekiranya mendapat taraf "tidak memuaskan".

	<b>B</b>		<b>Berterusan</b>	Menunjukkan sesuatu kursus yang melebihi satu semester untuk disiapkan dan tidak diberi mata nilaian.
	<b>R<sub>1</sub></b>		<b>Mengulang Kali Pertama</b>	Menunjukkan kursus diulang kali pertama.
	<b>R<sub>2</sub></b>		<b>Mengulang Kali Kedua</b>	Menunjukkan kursus diulang kali kedua.

## 2.0 Sistem Penilaian dan Purata Nilai Gred (PNG) [GPA = Grade Point Average]

- 2.1 Semua kursus adalah diambilkira dalam mengira **Purata Nilai Gred Semester (PNGS) [GPA = Semester Grade Point Average]** dan **Purata Nilai Gred Kumulatif (PNGK) [CGPA = Cumulative Grade Point Average]**.
- 2.2 Kursus-kursus yang mendapat **gred E dan F (Gagal)** juga diambilkira dalam menentukan **Purata Nilai Gred Semester (PNGS)** dan **Purata Nilai Gred Kumulatif (PNGK)**.
- 2.3 Gred bagi kursus-kursus ulangan adalah diambilkira dalam menentukan **Purata Nilai Gred Semester (PNGS)** dan **Purata Nilai Gred Kumulatif (PNGK)** bagi pelajar-pelajar yang mengulang. **Gred E dan F (Gagal)** asal bagi kursus berkenaan akan digugurkan dalam pengiraan PNGK yang baru.
- 2.4 Semua markah yang diperolehi oleh pelajar dalam semua peperiksaan adalah diambilkira dalam menentukan Purata Nilai Gred Kumulatif sebagai perkiraan prestasi akademik.
- 2.5 Purata Nilai Gred (PNG) akan ditentukan mengikut kaedah di bawah :

- 2.5.1 **Purata Nilai Gred Semester (PNGS)**  

$$\text{PNGS} = \frac{\text{Jumlah Nilai Gred dalam sesuatu semester}}{\text{Jumlah kredit semua kursus dalam semester tersebut}}$$

Di mana, Jumlah Nilai Gred = Nilai Gred x Jam kredit kursus

2.5.2 **Purata Nilai Gred Kumulatif (PNGK)**

PNGK = Jumlah Semua Nilai Gred yang diperolehi sehingga kini / Jumlah semua kredit yang diambil sehingga kini.

(Contoh pengiraan PNGS dan PNGK adalah seperti di Lampiran IV)

3.0 **Taraf Pelajar**

Pelajar-pelajar akan diletakkan pada taraf-taraf berikut berdasarkan kepada **Purata Nilai Gred Kumulatif (PNGK)** mereka :

3.1 **Lulus (L)**

- 3.1.1 Pelajar yang dapat mengekalkan pencapaian **Purata Nilai Gred Kumulatif (PNGK) sekurang-kurangnya 2.00** pada sesuatu semester berkenaan boleh meneruskan pengajian ke semester yang berikutnya.
- 3.1.2 Pelajar yang bertaraf **Lulus** pada sesuatu semester tetapi menarik diri atau gagal atau belum mengambil satu atau beberapa kursus, boleh dinaikkan ke semester berikutnya, tetapi pelajar berkenaan hendaklah mengambil kursus tersebut sehingga lulus.

3.2 **Lulus Bersyarat (LB)**

- 3.2.1 Pelajar yang mendapat **Purata Nilai Gred Kumulatif (PNGK) di antara 1.40 dan 1.99** pada satu-satu semester, dianggap sebagai **Lulus Bersyarat (LB)**.
- 3.2.2 Pelajar boleh meneruskan pengajian ke semester yang lebih tinggi tetapi mestilah memperbaiki PNGKnya kepada sekurang-kurangnya 2.00 pada semester-semester seterusnya.

3.3 **Gagal dan Diberhentikan (GB)**

- 3.3.1 Pelajar yang bertaraf **Lulus Bersyarat (LB)** dua kali berturut-turut akan diberi taraf **Gagal dan Diberhentikan (GB)**.

3.3.2 Pelajar yang mendapat PNGK **kurang daripada 1.40** pada mana-mana semester adalah dikira **Gagal dan Diberhentikan(GB)**.

3.3.3 Pelajar gagal dalam mana-mana mata pelajaran yang sama tiga kali berturut-turut adalah dikira **Gagal dan Diberhentikan(GB)**.

#### 4.0 **Penilaian Kursus Tidak Lengkap (TL)**

- 4.1 Pelajar dianggap tidak melengkapkan kursus atau diberi status Tidak Lengkap (TL) sekiranya pelajar tersebut tidak memenuhi semua keperluan kursus.
- 4.2 Pelajar yang tidak melengkapkan keperluan kursus kerana alasan munasabah (surat perubatan doktor, hal-hal kecemasan dan hal-hal lain yang tidak dapat dielakkan) perlu mendapat kebenaran bertulis dari Dekan Fakulti.
- 4.3 Pelajar yang mendapat status TL dibenarkan menduduki semula peperiksaan dan markah penilaian yang telah dibuat sebelum ini diambil kira sebagai markah penilaian kursus tersebut.
- 4.4 Sekiranya pelajar mengulang semula kursus tersebut, keputusan penilaian yang telah dibuat bagi kursus sebelumnya adalah batal.
- 4.5 Seseorang pelajar boleh diberi catatan “**TL**” lebih dari sekali tertakluk kepada tempoh pengajian dan struktur program yang diikutinya.

#### 5.0 **Pengumuman Keputusan Peperiksaan**

- 5.1 Keputusan bagi setiap kursus dan keputusan keseluruhan peperiksaan hendaklah diumumkan oleh Bahagian Hal Ehwal Akademik setelah mendapat kelulusan daripada Mesyuarat Senat.
- 5.2 Keputusan seseorang pelajar hendaklah ditahan sekiranya disahkan oleh Bendahari sebagai masih berhutang dengan pihak Universiti.
- 5.3 Pelajar akan menerima keputusan yang mengandungi Gred, Nilai Gred, Purata Nilai Gred Semester dan Purata Nilai Gred Kumulatif bagi setiap kursus yang diambil.

- 5.4 Universiti akan menyimpan rekod kekal gred bagi setiap kursus yang diambil oleh setiap pelajar. Satu salinan rekod akademik (transkrip) merupakan dokumen rasmi yang mengesahkan seseorang pelajar telah mencapai sesuatu taraf dalam pengajiannya.

6.0 **Peperiksaan Khas**

- 6.1 Tertakluk kepada peruntukan dalam Kaedah Akademik, pelajar dibenarkan menduduki satu peperiksaan khas sekiranya:
- 6.1.1 Pelajar tidak menduduki peperiksaan kerana sakit atau kecemasan dengan bukti bertulis atau mengalami lain-lain gangguan kesihatan. **Bukti bertulis (sijil cuti sakit) tersebut hendaklah diserahkan kepada Bahagian Hal Ehwal Akademik dalam tempoh 3 hari bekerja selepas tarikh mula cuti sakit.**
- 6.1.2 Pelajar yang mendapat kelulusan khas dari Senat.
- 6.2 Pelajar yang mengambil peperiksaan khas tidak dikenakan bayaran.
- 6.3 Permohonan secara bertulis hendaklah dikemukakan kepada Unit Peperiksaan, Bahagian Hal Ehwal Akademik dengan sokongan Dekan Fakulti.

7.0 **Peperiksaan Semula (Re-sit)**

Tertakluk kepada peruntukan dalam Kaedah Akademik, pelajar dibenarkan menduduki semula peperiksaan bagi:

- 7.1 Kursus yang ianya mendapat gred A- dan ke bawah dalam semester semasa. Dengan syarat jumlah markah tugas sekurang-kurangnya 40% dari markah keseluruhan tugas (*coursework*).
- 7.2 Permohonan secara bertulis hendaklah dikemukakan kepada Unit Peperiksaan Bahagian Hal Ehwal Akademik dengan sokongan Dekan Fakulti dan disertakan bayaran mengikut jam kredit yang didaftarkan. Bayaran dikenakan mengikut kepada jumlah jam kredit yang ditetapkan oleh Pejabat Bendahari.
- 7.3 Pelajar yang ingin menduduki peperiksaan semula mestilah menduduki pada semester berikutnya.

- 7.4 Pelajar tidak dibenarkan menduduki peperiksaan tersebut (*re-sit*) bagi kursus yang telah ditawarkan melebihi satu semester sebelumnya.
- 7.5 Gred C adalah gred tertinggi yang boleh diberikan kepada pelajar yang mendapat gred E dan F (keputusan peperiksaan akhir semester) yang menduduki peperiksaan semula (*re-sit*).
- 7.6 Pelajar yang menduduki peperiksaan semula (*re-sit*) memperolehi gred lebih rendah dari yang asal, gred yang asal akan diambil kira. Manakala sekiranya gred baharu lebih tinggi dari yang asal, maka gred baharu akan diambil kira.
- 8.0 **Mengulang semula kursus (Repeat)**
- 8.1 Pelajar yang memperolehi gred E dan F bagi sesuatu kursus dan memperolehi kurang daripada 40% markah keseluruhan kerja kursus tidak dibenarkan menduduki semula peperiksaan (*re-sit*).
- 8.2 Pelajar perlu mengulang semula kursus tersebut pada mana-mana semester pengajian semasa dalam tempoh pengajian.
- 8.3 Pelajar yang memperolehi gred selain dari E atau F, boleh mengulang semula kursus (*repeat*) dengan syarat membayar yuran yang ditetapkan. Walaubagaimanapun, jika gred yang baharu lebih rendah dari gred yang asal, maka gred yang asal akan diambil kira manakala sekiranya gred baharu lebih tinggi dari yang asal, maka gred baharu akan diambil kira.
- 9.0 **Pelajar Yang Sakit**
- 9.1 Atas perakuan pegawai perubatan yang bertauliah, seorang pelajar yang sakit sebelum, semasa atau sepanjang tempoh peperiksaan akhir semester, boleh dengan budibicara Unit Peperiksaan, Bahagian Hal Ehwal Akademik, dikecualikan daripada mengambil peperiksaan pada masa peperiksaan tersebut. Pelajar berkenaan dikehendaki menduduki satu peperiksaan khas pada masa lain yang akan ditetapkan.
- 9.2 Pelajar yang diperakui sakit untuk tempoh yang lama, telah menduduki peperiksaan dan gagal, boleh diberi peluang untuk menduduki Peperiksaan Khas bagi semua kursus yang ia gagal tertakluk kepada budibicara Dekan Fakulti berkenaan.

- 9.3 Pelajar yang menerima rawatan dan didapati tidak bersedia untuk menduduki peperiksaan kerana:
- 9.3.1 Penyakit yang memerlukan pembedahan dan rehat panjang selepas pembedahan yang mendapat perakuan Pegawai Perubatan yang berkenaan,
  - 9.3.2 Penyakit jiwa yang mendapat perakuan Pakar Perubatan yang berkenaan dan / atau
  - 9.3.3 Lain-lain penyakit kronik dan kritikal atau seumpamanya yang mendapat perakuan Pegawai Perubatan yang berkenaan tidak dibenarkan menduduki peperiksaan. Pelajar berkenaan dibenarkan untuk mengulang semester setelah pulih.
  - 9.3.4 Tempoh yang dibenarkan adalah tertakluk kepada tempoh maksimum pengajian sesuatu program berkenaan.
- 9.4 Pelajar yang menghadapi masalah psikologi kerana berlakunya kematiian atau kecemasan atau lain-lain masalah boleh mengemukakan permohonan penangguhan peperiksaan secara bertulis kepada Unit Peperiksaan, Bahagian Hal Ehwal Akademik dengan sokongan Dekan Fakulti.
- 10.0 **Penangguhan Semester**
- 10.1 Permohonan bagi penangguhan semester hanya dipertimbangkan sekiranya :
- 10.1.1 Permohonan dibuat secara bertulis kepada Bahagian Hal Ehwal Akademik dan mestilah disokong Oleh Dekan / Timbalan Dekan,
  - 10.1.2 Permohonan dibuat atas sebab gangguan kesihatan dengan pengesahan secara bertulis daripada Pegawai Perubatan yang bertauliah,
  - 10.1.3 Pelajar yang telah diberi kebenaran tidak mendaftar / menangguh semester tidak berhak mendapat atau menggunakan kemudahan-kemudahan Universiti, sehingga ia mendaftar semula.

- 10.1.4 Tempoh seseorang pelajar tidak mendaftar ini adalah dikira ke dalam tempoh maksimum yang dibenarkan untuk mendapat diploma / ijazah sarjana muda.
- 10.2 Pelajar yang telah mendapat pengesahan bertulis daripada Pegawai Perubatan yang bertauliah bahawa ia telah hamil **antara 6 bulan ke atas pada waktu pendaftaran**, dinasihatkan untuk memohon penangguhan semester.
- 11.0 **Pengecualian Kredit**
- 11.1 Pelajar-pelajar yang diterima masuk dengan kelayakan akademik selain daripada kelayakan biasa yang diterima sebagai ganti syarat kelayakan masuk ke Universiti, boleh diberi pengecualian kredit, untuk sebahagian dari kursus yang terdapat di Universiti, tertakluk kepada syarat berikut :
- 11.1.1 Kursus itu hendaklah dari program yang telah diambil dalam tempoh **tidak lebih daripada 5 tahun** terdahulu. **Jika kursus itu telah diambil lebih daripada 5 tahun, pelajar hendaklah menunjukkan bukti bertulis yang ia mempunyai pengalaman kerja yang relevan.**
- 11.1.2 Gred yang diperolehi bagi kursus-kursus yang hendak diminta pengecualian kredit itu hendaklah mendapat **tidak kurang daripada gred C bersamaan dengan mata nilaiannya gred 2.00 (80% daripada kandungan silibus menyamai taraf silibus di Universiti melaka kecuali kursus-kursus pra-syarat tidak akan diberikan pemindahan kredit).**
- 11.1.3 **Jumlah pengecualian kredit maksimum yang dibenarkan ialah 30% daripada jumlah kredit berdasarkan program yang diambil oleh pelajar di Universiti melaka.**
- 11.1.4 Kursus yang diberi pengecualian kredit mestilah daripada program yang mendapat akreditasi. Bagi program yang diambil di luar negara, program tersebut hendaklah dari program yang diiktiraf oleh pihak berkaitan di negara berkenaan.

11.1.5 Pengecualian kredit untuk kursus-kursus ko-kurikulum tidak dibenarkan sama sekali.

12.0 **Rayuan Semakan Semula Skrip Jawapan**

- 12.1 Pelajar boleh mengemukakan rayuan semakan semula skrip jawapan secara bertulis kepada Unit Peperiksaan, Bahagian Hal Ehwal Akademik dengan sokongan Dekan Fakulti dalam tempoh dua minggu setelah keputusan peperiksaan diumumkan.
- 12.2 Sebarang rayuan semakan semula skrip jawapan yang diterima selepas tempoh ini tidak akan dipertimbangkan.
- 12.3 Permohonan rayuan semakan semula skrip jawapan hendaklah mengikut peraturan-peraturan berikut:
- 12.3.1 Membuat bayaran yang telah ditetapkan bagi satu kursus yang dipohon.
  - 12.3.3 Semua pembayaran hendaklah dijelaskan di Pejabat Bendahari.
  - 12.3.4 Pelajar tidak layak mendapat semula kertas jawapan yang telah disemak.
  - 12.3.5 Semakan semula skrip jawapan untuk dua semester sebelumnya tidak dibenarkan.
- 12.4 Pelajar yang membuat semakan semula skrip jawapan memperolehi gred yang lebih rendah dari yang asal, gred yang asal akan diambil kira. Manakala sekiranya gred baharu lebih tinggi dari yang asal, maka gred baharu akan diambil kira.

13.0 **Rayuan Menyambung Semula Pengajian**

- 13.1 Pelajar yang diberhentikan daripada Universiti kerana mendapat taraf Gagal dan Diberhentikan (GB) bolehlah mengemukakan rayuan kepada Jawatankuasa Rayuan untuk dipertimbangkan. Jawatankuasa ini mempunyai kuasa berikut:

- 13.1.1 Menerima atau menolak daripada mempertimbangkan sesuatu rayuan itu.
  - 13.1.2 Membuat keputusan muktamad terhadap semua permohonan rayuan yang dipertimbangkan.
  - 13.1.3 Melaporkan kepada Senat bagi semua keputusan terhadap sesuatu rayuan.
  - 13.1.4 Setiap keputusan yang dibuat oleh Senat, setelah diperakukan oleh Jawatankuasa Rayuan, menurut peraturan ini adalah muktamad, dan sebarang rayuan selanjutnya terhadap keputusan tersebut tidak akan dilayan.
- 13.2 Setiap rayuan meneruskan semula pengajian hendaklah dikemukakan kepada Unit Peperiksaan, Bahagian Hal Ehwal Akademik dalam tempoh **dua (2) minggu**, selepas keputusan peperiksaan diumumkan. Setiap satu rayuan hendaklah disertai dengan bayaran proses yang telah ditetapkan.

### **LAMPIRAN I**

#### **PERATURAN PENGANUGERAHAN DIPLOMA / IJAZAH SARJANA MUDA**

- 1.0 Semakan status bergraduat pelajar dilakukan oleh Penyelaras Program berkenaan.
- 2.0 Pelajar tidak dibenarkan mewakilkan mana-mana pihak atau individu bagi menerima transkrip semasa majlis penganugerahan melainkan telah mendapat pertimbangan daripada Bahagian Hal Ehwal Akademik.
- 3.0 Pelajar yang telah menghilangkan sijil dan transkrip dikehendaki membuat laporan polis dan dikenakan bayaran seperti yang telah ditetapkan oleh Pejabat Bendahari.

### **LAMPIRAN II**

#### **1.0 PRA-PENDAFTARAN**

- 1.1 Pra-Pendaftaran **diwajibkan kepada pelajar yang sedang belajar** di Universiti ini dan boleh meneruskan pengajian mereka pada semester berikutnya. Bagaimanapun Pra-Pendaftaran ini tidak boleh ditafsirkan minggu kedua belas (12) sebagai janji pihak Universiti untuk membenarkan seseorang pelajar yang telah membuat Pra-Pendaftaran meneruskan pengajian semester berikutnya.
- 1.2 Pra-Pendaftaran diadakan selama dua minggu mulai minggu yang kedua belas (12) pada satu-satu semester. Pra-Pendaftaran dilakukan di akademi / fakulti dan dihantar ke Bahagian Hal Ehwal Akademik selewat-lewatnya hari terakhir **minggu keempat belas (14)**.
- 1.3 **Peringatan bayaran denda** : Pelajar yang lewat membuat Pra-Pendaftaran pada **minggu keempat belas (14)** akan dikenakan denda seperti yang telah ditetapkan oleh Pejabat Bendahari.

#### **2.0 PENDAFTARAN / PENYEMPURNAAN PENDAFTARAN**

- 2.1 Pendaftaran (bagi pelajar yang tidak membuat Pra-Pendaftaran akan dikenakan denda seperti yang telah ditetapkan oleh Pejabat Bendahari). Penyempurnaan pendaftaran (untuk pelajar yang telah

membuat Pra-Pendaftaran) adalah untuk mengesahkan kehadiran pelajar pada semester berkenaan.

- 2.2 Kuliah atau aktiviti akademik akan dimulakan pada hari pertama semester.
- 2.3 Pendaftaran dan penyempurnaan pendaftaran dijalankan selama **dua** minggu, iaitu pada **minggu pertama dan kedua semester** yang dijalankan secara atas talian.

#### **2.4 Syarat-Syarat Pendaftaran**

- 2.4.1 Sila kemukakan Kad Pelajar / Kad Matrik.
- 2.4.2 Sila kemukakan resit pembayaran yuran yang terakhir.
- 2.4.3 Lulus dalam peperiksaan akhir semester.
- 2.4.4 Pelajar tidak mempunyai tunggakan yuran pengajian.
- 2.4.5 Tidak dikenakan tindakan tatatertib.

### **3.0 PENDAFTARAN LEWAT**

- 3.1 Pendaftaran lewat bermaksud pendaftaran / penyempurnaan pendaftaran yang dibuat selepas minggu kedua (2) setiap semester. Pendaftaran lewat dikira mulai dari hari pertama minggu ketiga (3).
- 3.2 Pendaftaran selepas tempoh tersebut tidak akan diterima kecuali setelah mendapat persetujuan dari Dekan Fakulti dan Pengarah Bahagian Hal Ehwal Akademik. Denda akan dikenakan bagi kes ini mengikut kadar seperti yang telah ditetapkan oleh Pejabat Bendahari.
- 3.3 Pengarah Bahagian Hal Ehwal Akademik atau wakilnya boleh mengecualikan denda di atas berdasarkan syarat seperti berikut :
  - 3.3.1 Kes-kes kecemasan yang dikemukakan dengan bukti bertulis.
  - 3.3.2 Sijil Sakit (perlu dapat pengesahan dari Klinik Universiti melaka atau Hospital / Klinik Kerajaan).
  - 3.3.3 Kebenaran bertulis daripada pihak Fakulti.

**4.0 PINDAAN / PERUBAHAN PENDAFTARAN**

4.1 Pindaan tambah / gugur kursus boleh dilakukan oleh pelajar setelah mendapat persetujuan pensyarah Fakulti. Setiap pindaan yang dibuat akan dikenakan denda mengikut kadar seperti yang telah ditetapkan oleh Pejabat Bendahari. Denda tersebut boleh dikecualikan dengan persetujuan Dekan Fakulti setelah berpuashati dengan alasan yang dikemukakan.

**4.2 Tambah Kursus**

4.2.1 Hari terakhir bekerja minggu kedua (2) semester ialah hari akhir penambahan kursus boleh dilakukan.

4.2.2 Penambahan kursus selepas tempoh tersebut hanya boleh dibenarkan dengan persetujuan pensyarah kursus dan Dekan Fakulti.

**4.3 Gugur Kursus**

4.3.1 Hari terakhir bekerja minggu ketiga (3) semester ialah hari terakhir yang dibenarkan untuk menggugurkan sesuatu kursus.

4.3.2 Pengguguran yang dibuat selepas minggu ketiga (3) hingga minggu ketujuh (7) akan menyebabkan rekod catatan pelajar dicatat gred ‘F’, kecuali dengan persetujuan pensyarah dan Dekan Fakulti. Catatan “TD” akan dicatat dalam rekod pelajar.

4.3.3 Pengguguran kursus selepas minggu ketujuh tidak dibenarkan sama sekali.

**5.0 PEMBATALAN PRA PENDAFTARAN**

5.1 Pra-Pendaftaran seseorang pelajar yang mendapat keputusan ‘diberhentikan’ akan terbatal dengan sendirinya.

5.2 Pra-Pendaftaran pelajar akan terbatal secara automatik, jika tidak disempurnakan pada hari pendaftaran dan sehingga tempoh yang diberikan untuk pelajar berbuat demikian.

**6.0 PERTIMBANGAN UNTUK PENANGGUHAN PENDAFTARAN**

- 6.1 Seseorang calon yang sakit untuk tempoh yang agak lama boleh diberi penangguhan pendaftaran untuk semester tertentu oleh Dekan Fakulti dan disahkan oleh Senat. Dalam kes-kes seperti ini, perakuan bertulis daripada doktor perubatan yang terdiri daripada doktor kerajaan; (perakuan bukan dari doktor kerajaan, boleh dipertimbangkan dalam kes-kes tertentu walau bagaimanapun calon berkenaan diperlukan untuk menjalani rawatan doktor-doktor berkenaan terlebih dahulu).
- 6.2 Dalam kes sakit jiwa, kebenaran untuk mendaftar semula tertakluk kepada perakuan doktor-doktor yang berkenaan.
- 6.3 Seseorang calon yang menghadapi masalah lain daripada Perenggan 6.1 di atas boleh diberi penangguhan pendaftaran untuk sesuatu semester tersebut oleh Dekan Fakulti, tertakluk kepada masalah yang dihadapi. Permohonan menangguhkan pendaftaran boleh dibuat sehingga minggu ketujuh (7) sesuatu semester. Permohonan selepas minggu ketujuh (7) tidak akan dipertimbangkan tetapi pelajar hendaklah memohon untuk menangguhkan peperiksaan.

**7.0 PERTIMBANGAN UNTUK TIDAK MENDAFTAR**

- 7.1 Seseorang pelajar boleh menarik diri daripada pendaftaran dalam sesuatu semester atas sebab-sebab peribadi dengan mengemukakan permohonan kepada Pengarah Hal Ehwal Akademik dan mendapat sokongan dari Dekan Fakulti.
- 7.2 Penarikan diri selepas minggu ketujuh (7) semester akan menyebabkan kursus yang didaftar diberikan gred 'F', kecuali atas persetujuan / syor Dekan Fakulti gred "TD" akan dicatatkan.
- 7.3 Kecuali atas alasan-alasan di luar kawalan pelajar, pihak Senat atas syor Dekan Fakulti, di mana Fakulti pelajar tersebut mendaftar, boleh membenarkan permohonan penarikan diri itu. Bagi penarikan diri yang sedemikian gred "TD" akan diberi bagi semua kursus yang didaftar oleh pelajar tersebut.

8.0 **LAIN-LAIN**

8.1 **Yuran / Hutang**

- 8.1.1 Pelajar yang belum mendapat biasiswa / pinjaman mestilah berusaha menjelaskan yuran / hutang pengajian sebelum pendaftaran baru pada semester akan datang dijalankan.
- 8.1.2 Pelajar yang masih berhutang / belum menjelaskan yuran tidak dibenarkan mendaftar.
- 8.1.3 Pelajar yang biasiswa / pinjamannya dibayar melalui Bahagian Kewangan boleh terus mendaftar / menyempurnakan pendaftaran.

8.2 **Salinan Dokumen**

- 8.2.1 Salinan dokumen (seperti keputusan peperiksaan dan lain-lain) boleh diperolehi di Bahagian Hal Ehwal Akademik dengan bayaran **RM10.00** setiap satu.

8.3 **Kemaskini Maklumat**

- 8.3.1 Pelajar bertanggungjawab mengemaskinikan maklumat peribadi dari masa ke semasa dan memberitahu Fakulti untuk tujuan rekod dengan kadar segera apabila terdapat perubahan maklumat tentang dirinya.

### **LAMPIRAN III**

#### **PERATURAN / TINDAKAN KEPADA PELAJAR YANG MENGHADIRI KULIAH KURANG DARIPADA 80%**

1. Pelajar yang tidak menghadiri kuliah tanpa sebab-sebab tertentu, yang dapat diterima oleh Universiti, hendaklah diberikan surat-surat peringatan dan amaran.
2. Surat-surat amaran atau peringatan kepada pelajar mestilah dikeluarkan oleh Dekan Fakulti yang menawarkan / mengajar kursus berkenaan.
3. Apabila ketidakhadiran seseorang pelajar untuk sesuatu kursus itu melebihi 20%, maka pensyarah yang mengajar kursus berkenaan hendaklah melaporkan kes tersebut kepada Dekan Fakulti dengan mengemukakan sekali syor tindakan yang diambil ke atas pelajar tersebut.
4. Dekan Fakulti akan meneliti kes tersebut dengan sewajarnya dan membuat sesuatu keputusan mengenainya. Jika sekiranya sabit, Dekan Fakulti hendaklah memberitahu pelajar secara bersurat (salinan kepada Bahagian Hal Ehwal Akademik) tentang keputusan tersebut, bahawa pelajar berkenaan:
  - 4.1 tidak dibenarkan mengikuti pengajian atau kuliah yang seterusnya bagi kursus berkaitan.
  - 4.2 tidak dibenarkan menduduki kuiz, ujian, peperiksaan atau sebarang bentuk penilaian seterusnya bagi kursus tersebut. Dekan akan memaklumkan kepada Bahagian Hal Ehwal Akademik bahawa pelajar tersebut dihalang menduduki peperiksaan akhir. Bahagian Hal Ehwal Akademik akan mengeluarkan surat kepada pelajar tersebut bahawa pelajar dihalang menduduki peperiksaan.
  - 4.3 diberikan gred gagal (F) bagi mata pelajaran berkenaan dan pelajar dikehendaki mengulang mata pelajaran tersebut.

*Nota :*

*Tindakan-tindakan oleh Dekan Fakulti ke atas pelajar berhubung dengan perkara di atas tidak perlu dilaporkan kepada Senat.*

**LAMPIRAN IV**

**PENGIRAAN KEPUTUSAN PEPERIKSAAN**

Semester	Kursus	Pangkat	Mata Nilaian	Kepujian	Mata Nilai Pangkat
I	1	C +	2.33	2	4.66
	2	B	3.0	3	9.0
	3	F	0.0	3	0.0
	4	C	2.0	3	6.0
	5	B -	2.67	4	10.68
<b>Jumlah</b>			<b>15</b>	<b>30.34</b>	<b>30.34</b>
Purata Nilai Gred (PNGS)	Semester	Jumlah Mata Nilaian Pangkat	<u>30.34</u>	<u>15</u>	= <b>2.02</b>
<b>Jumlah Kepujian</b>					

Semester	Kursus	Pangkat	Mata Nilaian	Kepujian	Mata Nilai Pangkat
II	6	B	3.0	2	6.0
	7	B +	3.33	2	6.66
	8	A	4.0	3	12.0
	9	C	2.0	3	6.0
	10	B -	2.67	3	8.01
	11	B +	3.33	4	13.32
<b>Jumlah</b>			<b>17</b>	<b>51.99</b>	<b>51.99</b>
Purata Nilai Gred (PNGS)	Semester	Jumlah Mata Nilaian Pangkat	<u>51.99</u>	<u>17</u>	= <b>3.06</b>
<b>Jumlah Kepujian</b>					

**Jumlah Besar (Semester I + Semester II)**

$$\begin{array}{l} \text{Purata Nilai Gred} \quad \text{Jumlah Besar Mata} \\ \text{Kumulatif (PNGK)} \quad = \frac{\text{Nilaiang Pangkat}}{\text{Jumlah Besar Kepujian}} \quad = \frac{82.33}{32} = 2.58 \end{array}$$

**Nota :**

Penjelasan Pangkat Keputusan :

A+, A, A-	Cemerlang
B+, B, B-	Baik
C +, C, C-	Memuaskan
D +, D	Lemah
E, F	Gagal

$$\begin{array}{ll} \text{PNGS} & = \text{Purata Nilai Gred Semester} \\ \text{PNGK} & = \text{Purata Nilai Gred Kumulatif} \end{array}$$

**LAMPIRAN V****PROSEDUR PEMULANGAN / PEMBAYARAN YURAN**

MENARIK DIRI/ MENANGGUH SEMESTER SELEPAS MENDAFTAR (SEBELUM MINGGU KE 6)		MENARIK DIRI/ MENANGGUH SEMESTER SELEPAS MENDAFTAR (MINGGU KE 6 KE ATAS)		
PERKARA	YURAN DI CAJ	YURAN DI KEMBALIKAN	YURAN DI CAJ	YURAN DI KEMBALIKAN
mahasiswa/ mahasiswi semester 2 - 6	yuran pendaftaran	cagaran asrama	semua yuran pada semester tersebut	tiada
	yuran berulang	cagaran perpustakaan		
	insuran	konvokesyen		
	yuran asrama (1 bln)	yuran asrama (4 bln)		
		yuran pengajian (100%)		
	yuran pendaftaran	cagaran asrama		
mahasiswa/ mahasiswi semester 1	proses kemasukan	cagaran perpustakaan	semua yuran pada semester tersebut	tiada
	yuran asrama ( 1 bln)	yuran asrama (4 bln)		
		yuran pengajian (100%)		
		yuran berulang		
		insuran		

**LAMPIRAN VI****KADAR DENDA**

No	Perkara	Denda
1.	Lewat membuat Pra-Pendaftaran kursus (sebelum naik semester baru)	RM 10.00
2.	Tidak membuat Pra-Pendaftaran kursus (selepas naik semester baru)	RM 50.00
3.	Lewat membuat pengesahan pendaftaran kursus	RM 10.00 bagi hari pertama lewat dan RM 5.00 bagi hari-hari berikutnya (Denda Maksimum RM 200)
4.	Salinan dokumen (seperti keputusan peperiksaan dan lain-lain)	RM 10.00
5.	Kehilangan sijil dan transkrip	RM200.00
6.	Lewat mengemukakan permohonan pengecualian kredit selepas 3 minggu semester pertama pengajian	RM 50.00

**KADAR CAJ**

No	Perkara	Caj
1.	Peperiksaan Semula ( <i>reseat</i> )	Pelajar Diploma = RM 50.00 / jam kredit
		Pelajar Ijazah Sarjana Muda = RM 75.00 / jam kredit
2.	Rayuan meneruskan semula pengajian	RM 50.00
3.	Rayuan semakan semula skrip jawapan	RM 50.00/kursus
4.	Salinan dokumen (seperti keputusan peperiksaan, salinan surat tawaran dan lain-lain)	RM 10.00
5.	Permohonan surat akuan / transkrip sementara	RM5.00/permohonan
6.	Yuran Proses Permohonan pengecualian kredit (dalam tempoh 3 minggu semester pertama)	RM50.00